

dahulu sekalipun dunia akan rebut namun dunia itu tidak akan boleh mencampuri hal ehwal di dalam negara sendiri. Tetapi sekarang Singapura telah menjadi sebuah kerajaan yang berdaulat, cara yang boleh dilakukan di dalam masa Singapura bersatu di dalam Malaysia itu tidak akan dibuat dan kalau dilangkahkan tentunya Singapura akan meminta bantuan yang difikirkannya boleh memberi bantuan kepadanya.

Ini semuanya, dan apa juga yang berlaku dahulunya, ialah langkah-langkah beralih dan bertolak ansur yang dilakukan oleh Tengku. Langkah seperti ini sesekali ada baiknya tetapi kalau sentiasa dilakukan adalah sangat berbahaya dan merugikan terutamanya kepada orang-orang Melayu yang dibimbing oleh Tengku. Mudah-mudahan segala peristiwa yang telah berlaku itu akan menjadi cermin kepada Tengku dan mudah-mudahan pada masa yang akan datang, Tengku tidak akan berbuat dengan perbuatan-perbuatan yang boleh dipandang mengikut kemahuhan sendiri di dalam melaksanakan tugas bernegara.

Tengku mesti mengingat, lemah lembut ada pada tempatnya tetapi dalam melaksanakan tugas bernegara lemah lembut dan berdamai itu selalunya merugikan. Orang-orang Melayu, terutamanya orang-orang UMNO masih mengagung-agungkan Tengku tetapi sampai bilakah mereka akan mengagung-agungkan itu kalau sekiranya di dalam pandangan dan di dalam penglihatan mereka bertentangan dan menyolok mata mereka? Orang Melayu menghendaki Tengku tegas di dalam perjuangannya dan sekiranya ketegasan tidak dilaku dan dijalankan, dan Tengku tidak sanggup membela hak-hak amanah yang diutamakan kepadanya untuk mengawal maslahat orang Melayu yang telah hampir terputus itu, sudah pada saatnya Tengku berfikir di dalam dua perkara – terus berjuang dengan tegas atau memberi peluang kepada yang lain memimpin umat Melayu ke jalan bahagia dan makmur.

## Rancangan Pengawal Keluarga Secara Besar-besaran Di Singapura

Menteri Pelajaran Singapura, Tuan Yong Nyuk

Lin telah mengeluarkan suatu kertas putih sebanyak 25 muka kepada Parlimen Singapura mengenai rangka perbelanjaan sebanyak satu juta ringgit bagi melaksanakan Rancangan Keluarga selama lima tahun. Rancangan itu bagi mengadakan pekerjaan-pekerjaan klinik, penyelidikan dan siaran-siaran rancangan keluarga di Singapura bagi pihak kerajaan; dan mengemukakan tujuh jenis cara-cara merancangkan rancangan keluarga dengan cara-cara yang baru dengan memberi kemudahan-kemudahan dan bantuan-bantuan; dan doktor-doktor *private* diminta mengambil bahagian dan latihan atas cara yang terbaru dalam rancangan keluarga, dan mengambil bahagian “*part time*” dalam tiga jam di dalam tiap-tiap masa di klinik kerajaan atau di dalam tempat perubatan mereka sendiri.

Rancangan ini adalah ditujukan bagi mengurangkan peratusan-peratusan beranak yang telah menjadi 32 orang beranak dalam seribu dalam setahun, sampai dapat direndahkan menjadi 20 orang dalam seribu. Ini supaya berbanding dengan enam orang yang mati dalam seribu orang setiap tahun. Rancangan ini adalah dikaitkan dengan ekonomi dan pembangunan kerana kalau banyak bertambah penduduk tiap-tiap tahun maka perumahan dan kerja-kerja untuk mereka perlu diadakan.

Rancangan ini ditujukan kepada semua penduduk Singapura tetapi walau bagaimanapun ia tidaklah suatu perkara yang diwajibkan. Ini tentunya membolehkan agama-agama yang hukumnya tidak meluluskan sukatan beranak itu pemeluk-pemeluknya tidak dipaksa menyertai Rancangan Keluarga itu.

Adalah diharap bahawa kelak tidaklah pegawai-pegawai kerajaan salah terima atau salah langkah dalam melaksanakan tujuan yang tidak memperundang-undangkan “mesti” bagi